

Listovi gračaničkog kalendara od 29. 5. do 27.10. 2006. godine

OMER HAMZIĆ
.....

29. 5. 2006.

**Sedamnaesta sjednica Općinskog vijeća:
Odluka o općinskim priznanjima,
uskraćeno saglasnost za povećanje
cijena vode i komunalnih usluga, miris
gračaničkih lipa opet "zasmrdila" lokalna
politika i politikantstvo**

Na svojoj 17. sjednici, održanoj 29. 5. 2006. godine Općinsko vijeće usvojilo je Odluku o dodjeli općinskih priznanja, te nekoliko izvještaja o radu javnih službi i preduzeća u 2005. godini: JP "Komus", JP "Vodovod i kanalizacija" i JU "Bosanski kulturni centar". Vijeće nije prihvatilo ponuđeni Prijedlog odluke o utvrđivanju cijena usluga odvoza i deponovanja smeća niti Prijedlog odluke o utvrđivanju cijena vode i kanalizacije, što će se negativno odraziti na poslovanje i jednog i drugog preduzeća. Prihvaćena je informacija o higijensko-epidemiološkoj situaciji na općini Gračanica u 2005. godini i informacija o stanju sporta na općini Gračanica, sa ponuđenim prijedlozima mjera za poboljšanje sta-

nja u tim oblastima.

Nešto kao mali osvrt: iako je općinski načelnik podržao povećanje cijena kao razumno (50% manje od stope PDV sa primjenom od maja), vijećnici SDA i njihovi "saveznici" S BiH, BOS-a i LDS (ukupno njih 17), koji čine većinu u Općinskom vijeću, nisu prihvatili predloženo povećanje, što je izvanredan predizborni marketinški potez "podilaženja" ugroženim građanima grada Gračanice, koji su im na svim dosadašnjim izborima uskraćivali podršku i "odmjeravali od šake do lakta". Tu vijećničku većinu i parlamentu općine Gračanica, koja se javno deklarirše, a tako i djeluje od momenta stupanja na scenu, kao opozicija općinskom načelniku, kao izvršnoj vlasti (što je svakako nonsens i bosanski demokratski specijalitet, koji su nam "implementirali" stranci kao blagotvornu demokratsku inovaciju), nije briga u kakvom će se materijalnom stanju naći spomenuta dva javna preduzeća i hoće li na kraju krajeva "crknuti konj", a ti isti građani ožedniti, uživajući u prljavštini vlastitog grada. Bitno je udariti kontru općinskom načelniku i zadobiti simpatije

građana grada Gračanice po istom modelu po kojem su se stavili u odbranu gračaničkih lipa (da bi građani grada Gračanice tradicionalno naklonjeni SDP) mogli, je li, vječno uživati u mirisu i hladovini stoljetnih stabala gračaničkih lipa, sve dok im se ne obiju o glavu ili dok nekome bukvalno, pod teretom godina i nalletom vjetra, ne razbiju glavu. Stavljajući se, kobajagi u zaštitu gračaničkog zelenila i, ašičare, podilazeći nenaklonjenom biračkom tijelu grada Gračanice, mudri politički stratezi, oplakujući gračaničke lipe, u svojoj kritici ovoga puta nisu pretjerano žalili ni Medžlis islamske zajednice, da bi na kraju za glavnog krivca proglasili izvršnu vlast (čitaj načelnika) koja nije "prstom zaprijetila" efendijama što bez pitanja uređuju vlastito dvorište, a najgore je u svemu tome prošao lokalni radio i njegov urednik, što je ne pitajući sda-komitet, obavljao svoj redovan posao, emitujući reakcije građana.

Nakon trosatnog "natezanja vrljike" vijećnicu su uspjeli nekako "skrpiti" Odluku o ovogodišnjim općinskim priznanjima. Kad bi znali sa kakvom se argumentacijom nastupalo i kako se "licitiralo" sa pojedinim imenima, većina predloženih kandidata bi se javno odrekla tih priznanja, koja su potpuno devalvirala (čast izuzecima) i pojeftinila sama po sebi da bi bilo najpametnije potpuno ih ukinuti, a odluku i kriterije iz temelja promijeniti. U tom smislu, jednoglasno je zaključeno da se odmah otvori procedura promjene Odluke o priznanjima, koja će se valjda završiti do sljedećega Dana općine.

31. 5. 2006.

Promocija 21. broja "Gračaničkog glasnika" – u znaku Muzejsko-zavičajne zbirke

Promocija je tematski vezana za otvaranje Muzejsko-zavičajne zbirke i galerije u Gračanici. S razlogom, jer je Zbirka rezultat višegodišnjih napora Bosanskog kulturnog centra i brojnih entuzijasta i stručnih ljudi, koji se okupljaju oko "Gračaničkog glasnika". Na promociji su govorili prof. dr. Galib Šljivo sa Filozofskog i prof. dr. Salih Kulenović sa Prirodno-matematičkog fakulteta u Tuzli, koji je

na promociju došao sa grupom svojih studenata. Riječ je o naučnim radnicima i pedagozima koji pripadaju krugu "Gračaničkog glasnika" i koji su na svoj način pomogli da se otvori Zavičajno-muzejska zbirka u Gračanici. Prof. Kulenović (donedavno glavni i odgovorni urednik našeg časopisa), nekako neposredno prije posljednjeg rata, kada se temeljito vršila rekonstrukcija i renoviranje Osmankapetanove medrese, u funkciji višeg kustosa Muzeja istočne Bosne u Tuzli, zagovarao je otvaranje Zavičajne muzejske zbirke, odnosno depandasa tog muzeja u prostorijama spomenute medrese. Rat i događaji koji su uslijedili, onemogućili su, nažalost, realizaciju te ideje. Prof. Galib Šljivo, kao član Redakcije "Gračaničkog glasnika", napisao je prvi elaborat Zavičajne zbirke u Gračanici, koji je prosljeđen organima upravljanja Bosanskog kulturnog centra kao osnova za rad na realizaciji ovoga projekta. U svojim izlaganjima, gosti su pozdravili otvaranje Zavičajne zbirke u Gračanici i označili je kao dobru osnovu, ne samo za čuvanje kulturno-historijskog naslijeđa, već kao svojevrsnu prekretnicu u kulturnom životu Gračanice i njene šire okoline.

Pozdravljajući prisutne na promociji, načelnik općine Nusret Helić je rekao i ovo: "Dozvolite mi da vam se zahvalim što svojim prisustvom i dolaskom na ovu promociju učestvujete u našoj manifestaciji Dani Gračanice, koju organizujemo svake godine u periodu između 25. maja Dana odbrane i 2. juna Dana općine Gračanica. Posebno bih se zahvalio studentima Prirodno-matematičkog fakulteta iz Tuzle i njihovom profesoru, dr. Salihu Kulenoviću što su danas došli u Gračanicu da se upoznaju sa prirodno-historijskim znamenitostima i kulturno-historijskim naslijeđem općine Gračanice. U želji da odavde ponesu najljepše utiske, hoću da kažem da su došli u pravi momenat, baš kao s povodom, jer mi u petak otvaramo zavičajno-muzejsku zbirku, ovdje u okviru BKC, koja je upravo rezultat višegodišnjih napora brojnih entuzijasta i stručnih ljudi okupljenih oko našeg časopisa "Gračanički glasnik", čiji 21. broj upravo promoviramo. Htio bih još reći da su ovakvi i slični poduhvati u Gračanici uvijek ima-

li bezrezervnu podršku općinske vlasti. I za zavičajno-muzejsku zbirku i galeriju, mi smo obezbijedili početna sredstva, cijeneći da je takva jedna institucija potrebna ovome gradu, omladini, đacima, studentima, prolaznicima, gostima Gračanice i da će znatno unaprijediti kulturni život ove sredine, i u krajnjem biti u funkciji daljeg privrednog razvoja i biznisa, posebno u oblasti turizma i ugostiteljstva.”

2. 6. 2006.

Dan općine: Svečana akademija

U prisustvu brojnih gostiju, među kojima je bila i delegacija francuskog bratskog grada Flori Lezobre, na čelu sa svojim gradonačelnikom Pjerom Bušecom, u svom referatu na svečanoj akademiji, načelnik općine Nusret Helić je, između ostalog, rekao: “Ovo je općinski blagdan i po njegovoj definiciji mi bismo danas trebali da govorimo o ostvarenim rezultatima i stvorenim perspektivama, optimističkim pogledima u budućnost naše zemlje, u neko ljepše lice te budućnosti. Međutim, mi ne možemo pobjeći od nevesele stvarnosti koja nam, objektivno, pomučuje i ovakve trenutke radosti.

Šta hoću da kažem?

Depresivno stanje zemlje na globalnom planu, Dejtonski okvir koji nam ne da ni naprijed ni nazad, odvrtna prepucavanja i pripucavanja naših bosanskih tzv. velikih politika (primjer: ustavne promjene, opstrukcija reformi policije itd.), poslovična besperspektivnost u našoj ekonomiji, nevjerovatno nerazumijevanje bosanske stvarnosti u centrima svjetske političke moći itd.

Ne možemo biti ravnodušni, suočavajući se svakodnevno sa katastrofalnim učincima naših takozvanih “velikih politika” u svakodnevnom životu malog čovjeka, tu negdje, na lokalnom nivou, tamo gdje ljudi žive i rade.

Opći ambijent, prije svega, nije povoljan za razvoj privrede i pojavljuje se kao faktor koji uveliko sputava ambicije i mogućnosti, želje, ali i sposobnosti lokalnih biznismena. Iako su izgrađeni mnogi novi pogoni, privatizacija relativno uspješno završena, iako su u Gračanici investiciona ulaganja i povlačenje razvojnih kredita po svom obimu srazmjerno najveći na

Kantonu, a možda i šire, naša je procjena da bi sve to moglo ići puno brže. Kočnice postoje na makro-ekonomskom planu, čije poluge nisu u rukama lokalne zajednice.

Ipak, primjer Gračanice pokazuje da je u svemu tome tzv. ljudski faktor ključna pretpostavka bržeg privrednog razvoja i oporavka. Zato i sa ovog mjesta hoću da kažem da vjerujem u naše lokalne biznismene i da ponovim njihovu ključnu poruku državi: “Da im ne odmaže, a pomagati ne mora”.

Govoreći o tom poslovnom duhu i izuzetnom entuzijazmu običnih ljudi, koji su umorni od politike i politika, koji su odavno shvatili da su te politike važne same sebi i uglavnom od izbora do izbora, da su obećanja, obećanja - od kojih nema ništa ukoliko se ne zapljuje u šake i ne uhvati za vlastiti džep, podsjetio bih na nevideni entuzijazam koji naši ljudi pokazuju u realizaciji velikog projekta rekonstrukcije putne mreže na općini u želji da poboljšaju kvalitet života u svojim naseljima, mahalama, kvartovima i ulicama. Trebalo je ovih dana doći na Drafniće, u Stjepan Polje i još neka naša naselja i osjetiti htijenje običnog čovjeka i njegovu spremnost da se angažuje, da radi, da stvara, da se žrtvuje, ako će to poboljšati uslove života njegove djece, njegovih prijatelja, njegovih komšija. Jednu od tih saobraćajnica i danas simbolično puštamo u upotrebu. Trebalo je osjetiti radost tih naših malih i velikih radnih pobjeda, trebalo je vidjeti koliko je malo podsticaja našim ljudima potrebno da naprave čuda.

Projekat toplifikacije Gračanice već ulazi u odlučujuću fazu. Uskoro očekujemo formiranje firme “Eko toplane” Gračanica, koja će biti nosilac tog velikog infrastrukturnog i ekološkog projekta. Prilika je da se i na ovaj način zahvalim na podršci Vlade TK i Vlade Federacije, ne samo na riječima, već i konkretnim činjenjem na implementaciji tog projekta. Nastavljamo sa projektom deminiranja rijeke Spreče, ozbiljno radimo na projektu poboljšanja saobraćaja u gradu, nastavljamo i proširujemo našu saradnju sa evropskim gradovima i prijateljima, a posebno sa Florijem, Formijom, Haninge (Švedska) itd.

To su neki optimistički nagovještaji u na-

šoj lokalnoj zajednici, projekti čija realizacija zavisi od angažovanja i naprežanja snaga na domaćem terenu.”

2. 6. 2006.

Dan općine: dodijeljena tradicionalna općinska priznanja

Zlatna plaketa općine Gračanica: Ekpa “Saobraćajno-tehničke kulture OŠ “Džakule” i Plesni klub “Plamingo” Gračanica; dobitnici *Srebrna plaketa općine Gračanica:* Doo “Europrost” Miričina, Karate klub “Dado Alić” Miričina i Osnovna škola Gornja Orahovica; *Zlatna značka općine Gračanica:* Čigoja Lazo iz Gračanice, Nurikić Mehmed iz Gračanice i Širbegović Reuf iz Gračanice; *Srebrna značka općine Gračanica:* Brkić Elvir iz Piskavice, Jovanović Aleksanda iz Gračanice, Mehanović Suljo iz Gračanice, Softić Nihad iz Gračanice i Toman Tomislav iz Gračanice.

2. 6. 2006.

Dan općine: svečana akademija, predstavljena Fotomonografija “Gračanica – općina, grad, ljudi”

Knjiga je predstavljena u sklopu programa Svečane akademije. O knjizi je, između ostalog rečeno i ovo: “Ne znamo hoće li oni koji budu prelistavali ovu knjigu sami doći do odgovora na pitanje: da li je Gračanica u svojoj burnoj i bogatoj historiji bila nešto drugačija u odnosu na svoje bliže i dalje okruženje. Ali jedno je sigurno: gradeći život dostojan čovjeka, ovdje su ljudi postavljali sebi uvijek visoke ciljeve, ponekad nedostižne. Ubrzan privredni i sveopći društveni oporavak Gračanice po završetku rata za Bosnu i Hercegovinu (1992. – 1995.) neki su skloni nazvati privrednim čudom, drugi se pozivaju na bogatu poduzetničku tradiciju, treći na slučajnost. Gračanlije znaju da se ne živi od tradicije, još manje od slučajnosti. Nema tu nikakvog čuda, ima dosta rada, strpljenja i rizika, samopouzdanja i vjere u vlastite snage – najviše. Na tim osnovama zasniiva se budućnost ovoga grada i ove općine.”

2. 6. 2006.

Dan općine: otvorena Zavičajno-muzejska

zbirka i galerija u okviru Bosanskog kulturnog centra.

Vrpca su presjekli i tako simbolično otvorili Zavičajno-muzejsku zbirku i galeriju direktor Bosanskog kulturnog centra Izudin Duraković i općinski načelnik Nusret Helić, koji je tom prilikom, između ostalog rekao: “Otvarajući Muzejsko-zavičajnu zbirku i galeriju mi našoj općini i našem gradu darujemo jednu novu instituciju pod krovom Bosanskog kulturnog centra, koja jeste možda neki mali dodatni trošak u našem budžetu, ali je zato veliki pomak i veliki korak u kulturnom životu našeg grada. Otvarajući ovu zbirku mi ispunjavamo san mnogih entuzijasta i poslanika kulture, koji su godinama radili na stvaranju pretpostavki za otvaranje Muzejsko-zavičajne zbirke, ali istovremeno ispunjavamo zahtjeve i želje mnogih naših građana koji su odavno zagovarali takvo jedno gradsko obilježje i materijalno-historijsku potvrdu narodne tradicije, kulture i duhovnosti ovoga grada.

Nećete mi zamjeriti ako kažem da, otvarajući ovu zbirku, mi koji obnašamo aktuelnu vlast na najbolji način ispunjavamo svoje davno dato obećanje: “Gračanicu učiniti gradom”.

Prilika je da se sa zahvalnošću danas upravo na ovom mjestu prisjetimo našeg vrijednog i agilnog sugrađanina, istaknutog prosvjetnog radnika, pokojnog Branka Vajića, koji je još davnih 50-ih i 60-ih godina počeo prikupljati, da kažem, starine našeg zavičaja, podsticati stručnu obradu arheološko-historijskih lokaliteta i predmeta materijalne kulture našeg kraja, koji je na taj način, upravo, iz čistog entuzijazma i pregalaštva udario prve temelje ove zbirke.

Ne mogu, a da ovom prilikom ne spomenem i značajnu ulogu u tome i naših bivših direktora Narodnog univerziteta i Bosanskog kulturnog centra: gospodina Nesiba Sumana, Omera Hamzića, Nijaza Omerovića, zatim nekoliko gračaničkih entuzijasta društvenih i kulturnih radnika, među kojima ističem Čamila Naimkadića i Hajrudina Junuzovića. U tom kontekstu posebno želim da istaknem i pohvalim kompletnu ekipu koja se godinama

okuplja oko časopisa "Gračanički glasnik", koja intenzivno obrađuje naše kulturno-historijsko naslijeđe i afirmiše Gračanicu kao grad izuzetno duge tradicije i bogatog kulturno historijskog naslijeđa širom svijeta.

Bosanski kulturni centar, na čelu sa direktorom Izdinom Durakovićem, na neki način nam je garancija da ova Zavičajna zbirka i galerija neće biti neka statična zatvorena institucija, već dinamičan organizam oko kojeg će se okupljati, kako stručni ljudi, profesori, studenti, istraživači, tako i svi oni koji vole ovaj grad. Uvjeran sam da će naši građani podržati ovu zbirku na taj način što će je trajno obogaćivati zanimljivim i historijski vrijednim sadržajima i predmetima iz svojih privatnih kolekcija, stavljajući sve to u funkciju nauke, afirmacije i boljeg upoznavanja vlastitog identiteta i identiteta grada Gračanice.

I sa ovog mjesta pozivam sve svoje sugrađane da se uključe u prikupljanje, da kažem starina, da donesu, poklone ili prodaju određene predmete koji će postati vrijedni eksponati dostupni javnosti i koji će obogaćivati našu zbirku."

2. 6. 2006.

Dan općine: puštena u saobraćaj rekonstruisana Ulica Gračaničkih gazija

...u dužini od jednog kilometra. Uloženo 250.000 KM. Sredstva obezbijedili privrednici čiji su objekti locirani u toj ulici, jednim dijelom građani i općina iz sredstava namijenjenih za rekonstrukciju gradskih saobraćajnica.

2. 6. 2006.

Dan općine: otvoren poslovni centar "Gora Monj"

Radi se o još jednom savremeno opremljenom trgovačkom poslovnom centru u Gračanici, od oko 3000 kvadratnih metara korisnog prostora u koji je firma "Gora Monj" uložila oko milion KM. Trgovački centar se nalazi na vrlo atraktivnom mjestu, na samom ulazu u Gračanicu, sa južne strane, koji će znatno obogatiti trgovačku ponudu u Gračanici u "grani" neprehrambenih proizvoda.



Ulica Gračaničkih gazija

12. 6. 2006.

Opet poplave...

Usljed obilnih kiša u posljednjih nekoliko dana Spreča je poplavila oko 200 hektara zemljišta poljoprivrednog zemljišta u mjesnim zajednicama: Donja Lohinja, Donja Orahovića i Miričina. Nisu bili ugroženi stambeni ni infrastrukturni objekti.

29. 6. 2006.

Osamnaesta sjednica Općinskog vijeća Gračanica: nakon pažljivijeg sagledavanja informacije o privrednim kretanjima na općini u 2005. godini, svako ozbiljan će se zapitati: je li Gračanica, stvarno ili samo prividno, od posla čaršija

Po svim pokazateljima koji su izneseni u informaciji, Gračanica je daleko ispod prosjeka Tuzlanskog kantona i Federacije BiH: po zaposlenosti, po visini plaća, po investicijama, po visini potrošačke korpe... Šta se stvarno dešava u gračaničkom biznisu i koliko se može vjerovati prezentiranim podacima? To je pitanje na koje su vijećnici uzalud tražili odgovor. Nisu ga trebali ni tražiti jer poluge privrednog razvoja su ionako daleko od općine i ingerencija Općinskog vijeća.

Ostala je doza zabrinutosti, nevjerice i razočarenja. Je li "Gračanica od posla čaršija" već ispuhana propagandna floskula ili je ona to stvarno nekad bila, a sad, očigledno, više nije. Radi se o ozbiljnom zaostajanju za okruženjem. Nije Gračanica u privrednom pogledu stagnirala, samo su se drugi brže razvijali. Šta je uzrokovalo stagnaciju? Odgovore treba tražiti u strukturi privrede u kojoj prevladavaju niskoakumulativne grane (obuća i konfekcija), gdje je skoncentrisan najveći broj slabo plaćenih i umnogome neosiguranih radnika, građevinarstvo, koje boluje opću bolest BiH gospodarstva, poljoprivreda..., gdje je peradarski kompleks u kolapsu... Radi se i o investicionom posustajanju u odnosu na entuzijizam prethodnih godina... Nisu rijetkost ni klasični bankroti, propadanje nekih firmi poput "Feringa", ogromna dugovanja, pokretanje hipoteka... Jednom riječju – Gračanica od posla čaršija više to nije.

30. 6. 2006.

"Fortuna" otvorila pogon u Karanovcu

Pošto je otvorila svoje pogone u Lukavici i Malešićima, na području gračaničke općine, ova mnogoljudna firma iz porodice takozvane niskoakumulativne privrede, prekoračila je entitetsku crtu i otvorila proizvodni pogon u Karanovcu, svom komšiluku s one strane Spreče. U opremanje pogona "Fortuna" je uložila 150.000 KM, u pogonu će posao dobiti 80 radnika. Na svečanosti, povodom otvaranja pogona, direktor "Fortune" Safet Pjanić najavio je nove poslove u "manjem entitetu".

1. 7. 2006.

Otvorena džamija u Gornjoj Miričini

Tim je povodom organizovana svečanost kojoj su, pored džematlija Miričine i susjednih sela gračaničke i lukavačke općine, prisustvovali brojni gosti, među kojima je bio i muftija banjalučki ef. Čamdžić. U ime općine Gračanica, prisutnim vjernicima se obratio i općinski načelnik Nusret Helić, koji je izgovorio sljedeću poruku: "Neka sa ovog hajirli mjesta krenu molitve ispunjene vjerom, ljubavlju i ljudskom dobrotom, neka ovi ljudi koji izgradiše džamiju nastave živjeti u miru

i slozi, na nekim drugim zajedničkim i svima korisnim poslovima. Neka ovo selo kao i sva druga naselja na području općine Gračanica budu još bogatija kako u materijalnom tako i duhovnom pogledu."

2. 7. 2006.

Ljetne večeri pod lipama Gračanice – četvrti put

Po svemu sudeći, ovo postaje tradicionalna kulturna manifestacija koja već ima svoju fizionomiju i odgovarajuću profilaciju, prilagođenu ljetnom periodu i ambijentu gračaničke čaršije, ali i nekoliko većih sela gračaničke općine u koja će ovog ljeta stići ljetni karavan "Pod lipama Gračanice". Manifestacija je počela smotrom saza pod nazivom "Zlatne strune Bosne", koju je vodio naš poznati publicista i književnik Vehid Gunić.

4. 7. 2006.

Tematska sjednica Općinskog vijeća: Prostorni plan Tuzlanskog kantona za period 2005. – 2025.

Sjednica je sazvana radi sumiranja javne rasprave i utvrđivanja primjedbi na ovaj važan dokument, neposredno pred njegovu konačno usvajanje od strane Skupštine Tuzlanskog kantona. Vijećnici su se usaglasili da se predlagачu upute sljedeće primjedbe i prijedlozi: da se radi stvaranja uslova za brži razvoj privrede izvrši "proširenje" privrednih zona u odnosu na predložene površine, da se koriguje trasa planiranog magistralnog puta i zaobilaznice oko grada i da se bolje istaknu prirodni resursi (termomineralni izvori) i područja za razvoj turizma u sjevernom planinskom području općine. Radi se, ustvari, o zahtjevu da se navedene pozicije u Prostornom planu Tuzlanskog kantona usklade sa Prostornim planom općine Gračanica, pa se i očekuje da će biti prihvaćene od strane predlagачa.

7. 7. 2006.

Gračaničke kere i vez na izložbi u Muzeju grada Sarajeva

Riječ je o izložbi koju je organizovala Asocijacija za intelektualne aktivnosti i spašavanje naslijeđa BiH (AIASN BiH) u saradnji sa

Muzejom grada Sarajeva u izložbenom prostoru Svrzine kuće u Sarajevu pod naslovom "Čipka kera, neprolazna ljepota, Banja Luka, Gračanica, Tešanj". Preko 40 žena iz Gračanice koje se bave vezovima i ručnim radom na organizovan način posjetilo je ovu izložbu. Gračanička "reprezentacija" je bila najbrojnija i najzapaženija. Sa svojim originalnim radovima – kerama nastupilo 12 je žena. To su: Zehra Ahmetašević, Fatima Avdić, Hatidža Begić, Azra Cerić, Azema Džambo, Hanifa Hadžić, Džemila Helić, Ferida Helić, Dženita Helić, Šemsa Purač, Rašida Salihfendić i Munira Vehabović. Uz Gračanke, na izložbi su sa svojim radovima nastupile četiri učesnice iz Banja Luke i jedna iz Tešnja

26. 7. 2006.

"Gračanlije u prvoj proleterskoj", početak realizacije šireg projekta pod naslovom "Likovi poznatih antifašista s područja općine Gračanica" u okviru Općinskog odbora SUBNOAR-a Gračanica, koji tako unosi bitne novine u obilježavanju značajnih datuma iz naše antifašističke prošlosti.

Upravo u sklopu tog projekta, a u povodu obilježavanja Dana ustanka BiH i Dana borca organizovana je javna tribina na kojoj je mr.sc. Omer Hamzić govorio o likovima četvorice Gračanlija koji su 8. 8. 1942. stupili u Prvu proletersku brigadu – Hazimu Vikalu, Hajrudinu Mehinagiću, Salihu Osmanbegoviću i Ekremu Duriću. Vikalo je poginuo nekoliko mjeseci nakon stupanja u brigadu, dok su ostala trojica prošli slavni put brigade, preživjeli rat i ostvarili zavidne vojničke karijere. Među živima je jedino general Ekrem Durić, koji je i prisustvovao tribini. O potrebi borbe protiv savremenih oblika fašizma govorio je i aktuelni predsjednik SUBNOAR-a BiH Jure Galić. Tribini je prisustvovala i Bahra Durić, sestra generala Durića, pripadnica omladinskog i skojevskog pokreta u Gračanici tokom Drugog svjetskog rata.

27. 7. 2006.

19. sjednica Općinskog vijeća: Usvojena Odluka o izmjeni i dopuni Plana

kapitalnih ulaganja u 2006. godini, Vijeće potvrdilo statute javnih zdravstvenih ustanova u Gračanici i pored upozorenja općinskog načelnika da su odredbe po kojima općina kao osnivač ne daje više suglasnost na izbor direktora - nezakonite.

Najviše vremena na ovoj sjednici vijećnici su potrošili raspravljajući o Odluci o izmjeni i dopuni Plana kapitalnih ulaganja u 2006. godini. Riječ je o velikom projektu - ulaganjima u putnu infrastrukturu iz zaduženja Budžeta na pet godina u ukupnom iznosu od 3.500.000 KM. Predloženom odlukom preraspodjeljuje se iznos od 305.000 KM koji se pojavljuje u Budžetu zbog toga što je izvršeno pomjeranje početka otplate anuiteta kao posljedica pomjeranja rokova početka radova na putnoj infrastrukturi (usljed produžene procedure usaglašavanja, predugačkih tenderskih procedura itd.), za koliko će se pomjeriti i rok konačne otplate kredita, čiji iznos ostaje isti.

Usvojene su još tri važne odluke: o visini i načinu plaćanja naknada i troškova u postupku legalizacije bespravno izgrađenih objekata, o namjeni utroška sredstava iz koncesionih naknada i odluka o imenovanju komisije za odabir korisnika projekata povratka i rekonstrukcije stambenih jedinice. Vijeće je, bez veće rasprave, dalo saglasnost na prijedlog odluke o utvrđivanju cijena usluga odvoza i deponovanja smeća JP "Komus" d.o.o. Gračanica.

Šira rasprava vođena je i oko saglasnosti na izmjene i dopune statuta tri gračaničke javne zdravstvene ustanove: Opće Bolnice "Dr. Mustafa Beganović", Doma zdravlja i Gradske apoteke. Jednom od izmjena, Općini se kao osnivaču tih javnih ustanova uskraćuje pravo davanja saglasnosti na izbor direktora, kako je bilo u dosadašnjim njihovim statutima. I pored upozorenja općinskog načelnika na nelogičnost i nezakonitost te izmjene, većinom glasova vijeće je ipak dalo suglasnost na te akte. Nakon toga, općinski načelnik je obavijestio vijećnike da će u skladu sa svojim nadležnostima pokrenuti postupak utvrđivanja ustavnosti i zakonitosti tih akata.

Vijeće nije usvojilo zahtjev Udruženja

“Merhamet” za djelimično finansiranje aktivnosti narodne kuhinje u Gračanici, uz zaključak da se o podršci toj aktivnosti “Merhameta” vodi rasprava i odlučuje u postupku usvajanja budžeta za sljedeću godinu.

Bez ikakve rasprave vijećnici su usvojili informaciju o stanju i problemima u vezi sa upotrebom opojnih droga na području općine Gračanica za period januar-jun 2006. godine, zatim informacija o izbjegličkim naseljima i povratnicima na području općine, te izvještaj o procijenjenoj šteti od poplava na području općine Gračanica u periodu jun 2006. godine.

5. 8. 2006.

U Gornjoj Orahovici otvorena novoizgrađena džamija...

Svečanosti su prisustvovali brojni gosti, među kojima i općinski načelnik Nusret Helić, koji je, obraćajući se džematlijama Orahovice i mnogobrojnim okupljenim građanima, izrazio nadu da će Orahovičani biti jedinstveni i u drugim akcijama kao što su bili jedinstveni i u izgradnji te džamije.

6. 8. 2006.

...i igralište za male sportove

...u koje je uloženo oko 30.000 KM koje su prikupili mještani Gornje Orahovice, a nije izostala ni pomoć Općine i Kantona.

11. 8. 2006.

Promocija “Gračaničkog glasnika” u Srebreniku: tema “Dovište Ratiš”

To je prvo predstavljanje ovog Časopisa u Srebreniku. Organizator je bio Mjesni odbor “Preporoda”, a govorili su: glavni urednik Časopisa mr. Omer Hamzić, koji je predstavio Časopis i Rusmir Djedović, koji je govorio o glavnim karakteristikama dovišta Ratiš na tromeđi općina Srebrenik, Gračanica i Lukavac. U posljednjem, 21. broju “Gračaničkog glasnika”, Djedović je objavio kraću studiju, kao prvi ozbiljniji prilog o tom značajnom kulturnom mjestu u ovom dijelu Bosne, koji je izazvao zapaženo interesovanje u javnosti. O kulturnim mjestima uopće i njihovom mjestu u duhovnom životu Bošnjaka, kao gost na ovom skupu govorio je i prof. Mehmedalija



Nova džamija u Gornjoj Orahovici

Hadžić, savjetnik u Savjetu ministara Bosne i Hercegovine.

22. 8. 2006.

“Most” i Mostar u Gračanici

U organizaciji BKC Gračanica i Redakcije časopisa “Gračanički glasnik” obavljena je promocija Časopisa za kulturu “Most” iz Mostara, na kojoj se svojim stihovima i prozom predstavio glavni i odgovorni urednik “Mosta”, književnik Alija Kebo. Tako su dva časopisa “Gračanički glasnik” i Mostarski “Most” na najbolji način uspostavili komunikaciju između dva grada i dva bosansko-hercegovačka, toliko bliska i toliko različita kulturna prostora. Alija Kebo, “mostopisac”, govoreći svoje tople i pomalo opore stihove, prenio je dio nevesele stvarnosti sadašnje Hercegovine i Mostara (izbijanog ratom) i dio nade da sutra ipak mora biti bolje. Nakon ovog susreta, ostao je otvoren poziv Gračanlijama da uzvrate posjetu Mostaru. Poziv potpisuje “mostopisac” Alija Kebo, iskreno i od srca.

1.9. 2006.

Otkriveno spomen-obilježje šehidima i poginulim borcima i civilnim žrtvama u

ratu za Bosnu i Hercegovinu 1992. - 1995. u Stjepan Polju i mještanima Stjepan Polja, poginulim u Drugom svjetskom ratu

Spomen-obilježje je otkriveno u prisustvu porodica poginulih, te mnogobrojnih gostiju i građana Stjepan Polja i susjednih mjesnih zajednica. U ratu za Bosnu i Hercegovinu poginulo je 18 boraca (ili 5,5% od ukupnog broja poginulih boraca na općini) i 12 civila (ili 12% od ukupnog broja poginulih civila na općini). U neposrednoj blizini otkriveno je i spomen obilježje poginulim mještanima Stjepan Polja u Drugom svjetskom ratu.

1.9. 2006.

Počela predizborna kampanja za sedme po redu izbore u Bosni i Hercegovini, zakazane za 1. 10. 2006.

Na ovim parlamentarnim izborima "svoje mjesto pod suncem" na nivou Bosne i Hercegovine potražiti će 56 političkih "subjekata", od čega 36 političkih partija, 8 koalicija i 12 nezavisnih kandidata. Iz tog "političkog obilja" birače općine Gračanica pokušat će usrećiti 14 političkih stranaka i koalicija i 4 nezavisna kandidata.

Da ovi izbori ne donose ništa novo (niti ohrabrujuće) potvrđuje podatak da preko 70% kandidata na listama čine već poznate (i istrošene) face iz skupštinskih klupa i političkog života u Bosni i Hercegovini. Što se tiče općine Gračanica, taj procent je nešto i veći. To će, svakako, proizvesti i veću apstinenciju birača u odnosu na prethodne izbore.

2. 9. 2006.

Otvorena džamija u džematu Drafnići (Gračanica)

Otvaranje je obavljeno uz uobičajene vjerske i narodne svečanosti i u prisustvu više hiljada vjernika i visokih gostiju. Džamija je izgrađena sredstvima dže-

matlija Drafnića i uz pomoć brojnih donatora s područja općine i šire. Priznanje i čast da "otključa" džamiju i tako je simbolično preda Islamskoj vjerskoj zajednici na upotrebu dobio je Drafničanin Osman Ahmetagić, predsjednik Građevinskog odbora i jedan od najistaknutijih džematlija u ovom velikom harrli poslu.

Kako je rečeno, ove godine otvoreno je 77 džamija u Bosni i Hercegovini, od čega tri na općini Gračanica.

Upućujući čestitke džematlijama Drafnića, načelnik općine Gračanica Nusret Helić, na tom skupu je, između ostalog, rekao: "Što se tiče Drafničana, moram reći, da nikada nisam u njih ni sumnjao - oduvijek, što nau-me to i urade, složno i zajednički, komšijski, pomažući jedni drugima. To su pokazali na mnogim krupnim poslovima koje su do sada uradili u svojoj ulici, u svojoj mahali, gradeći i asfaltirajući ulice i sokake, dovodeći vodu, rasvjetu, kanalizaciju - sve s ciljem da se bolje i pristojnije živi u ovom dijelu Gračanice. Tako su radili Drafničani, ove, naše generacije, ovog sadašnjeg džemata, tako su složno radili i njihovi očevi i djedovi gradeći staru džamiju u ovoj mahali, sada već daleke 1936. godine, tako su radili i oni prije njih, gradeći medžlis početkom 18. stoljeća, kao i oni prije njih itd.

Drafničani su primjer kako se u slozi, do-



Detalj sa otvorenja nove džamije na Drafnićima

broj volji i komšijskoj solidarnosti mogu rješavati mnoga krupna pitanja od zajedničkog interesa.”

8. 9. 2006.

Naučni skup “Srebrenička banovina i srednjovjekovna Bosna”

Njegovim održavanjem označen je kraj ovogodišnje manifestacije “Srebrenik – otvoreni grad umjetnosti” čiji je organizator Centar za kulturu i informisanje Srebrenik. Na naučnom skupu uzelo je učešće više historičara, u čijoj je sferi interesovanja razdoblje srednjovjekovne bosanske države i razvoj bosanskih gradova i utvrda. Između ostalih, svoja saopćenja na skupu podnijeli su prof. dr. Ivan Balta sa Pedagoškog fakulteta Osijek, prof. dr. Azem Kožar, dekan Filozofskog fakulteta u Tuzli, prof. dr. Salih Jalimam, dekan Pravnog fakulteta iz Zenice, mr. sc. Dževad Drino, viši asistent Pravnog fakulteta u Zenici, zatim mr. sc. Edin Bašić iz Gradačca, mr. sc. Omer Hamzić iz Gračanice, prof. Rusmir Djedović iz Gračanice, prof. Midhat Spahić iz Tuzle itd.



Stari grad Srebrenik

13. 9. 2006.

Svetlana Broz, unuka Josipa Broza Tita, u Gračanici

Kao aktivistkinja nevladine organizacije Gariwo, Brozova je okupljenim Gračanlijama, svih generacija održala zanimljivo predavanje o građanskoj hrabrosti kao oblicima suprotstavljanja negativnim autoritetima

u društvu, ilustrujući ih primjerima iz svoje knjige “Imam petlju”. Potom se razvio zanimljiv dijalog u kojem su i prisutni iznosili pozitivne i negativne primjere građanske hrabrosti iz vlastitog okruženja.

15. 9. 2006.

Festival kratkometražnog filma “Gračanica 2006.”

Iako se uklopila u kulturni milje ovog grada u kojem se filmovi prikazuju još od daleke 1938. godine, ova kulturna manifestacija se po mnogo čemu izdvaja, razlikuje i nadgrađuje neke dosadašnje lokalne klišeje u organizaciji kulturnog života u Gračanici. Riječ je o jednom izuzetnom osvježenju u takozvanoj lokalnoj kulturnoj ponudi, o manifestaciji koju je osmislila, kreirala i organizovala grupa mladih ljudi okupljenih oko gračaničke renomirane firme *IT Kompjuters* i njenog glavnog menadžera Nihada Softića, koji je i organizaciono i materijalno u potpunosti stao iza ovog izvanrednog kulturnog projekta. To je, koliko znam, prvi puta u našem gradu da se, bez ikakvih političkih, predizbornih, ovih ili onih opterećenja okupila grupa mladih ljudi i odlučila da napravi neki koristan posao za svoj grad. Govoreći na otvaranju manifestacije, načelnik općine Gračanica Nusret Helić, nije krio svoje zadovoljstvo; “Ja kao načelnik mogu samo da kažem – aferim i da pozovem sve kreativne mlade ljude s područja naše općine da odlučnije i hrabrije ulaze u ovakve i slične projekte. Obećavam da će svaka njihova inicijativa, osmišljen program i korisna akcija imati podršku općine. Iskreno se nadam da je ovo početak jednog procesa u kojem na scenu moraju izaći mlade Gračanlije.”

Iza ove manifestacije i organizaciono i materijalno-finansijski stalo je jedno dioničko društvo, jedna firma, čiji je menadžment odlučio da napravi ovaj iskorak bez mnogo kalkulacija i sa jednom željom: da uljepša život u gradu čije je ime upisano u memorandumu firme kao njeno sjedište. Naravno, tu su zanemareni neki neposredni i kratkoročni efekti, ali dugoročno, ljudi koji vode gračanički *IT Kompjuters* itekako su prepoznali i svoj poslovni i svaki drugi interes. “Želim javno da

pohvalim takvu njihovu poslovnu filozofiju u nadi da će i drugi gračanički biznismeni, kao lokal-patrioti krenuti ovim primjerom. Ja ih i sa ovog mjesta pozivam da još više pomažu naše kulturne i sportske manifestacije, vrijedne mlade talente, vrijedne izdavačke, muzičke i druge projekte jer sam siguran da će dugoročno naći u tome svoj poslovni i svaki drugi interes kao što ga je našao i *IT Kompjuters*. Samo tako možemo stvoriti bolje uslove za život u ovom gradu”, poručio je načelnik Helić. Ljubitelji filma u Gračanici imali su priliku “odgledati” 30-ak kratkih filmova, različite tematike, žanra i filmskog izraza, počevši od ozbiljnih dokumentaraca do pravih malih dječjih filmskih bisera iz Bosne i Hercegovine, Rumunije, Bugarske, Estonije, Srbije, Crne Gore i Mađarske.

22. 9. 2006.

**Dvadeseta sjednica Općinskog vijeća:
Nacrt odluke o izmjenama i dopunama
Regulacionog plana “Centar” Gračanica
i Informacija o toku projekta izgradnje
putne infrastrukture iz zaduženja općine**

... izazvali su najviše pažnje vijećnika na ovoj sjednici. Predložene su značajne izmjene u Regulacionom planu Centra Gračanice (između ostalog, izmjena namjene sadašnjeg prostora koji zahvata Rukometno igralište i zgrada “Partizana”), o kojima će se voditi javna rasprava u narednih 60 dana. Projekat izgradnje putne infrastrukture na općini, kao jedan od najvećih te vrste u posljednjih dvadesetak godina, bez obzira na teškoće koje su nastale usljed složene procedure oko izbora i ustupanja radova zainteresovanim izvođačima, odvija se prema planu i najvećim dijelom će se realizovati do kraja ove godine. Na ovoj sjednici usvojen je i izvještaj o utrošku budžetske rezerve za prvo polugodište 2006. godine i Informacija o snabdijevanju građana pitkom vodom i statusu vodoopskrbnih objekata na općini Gračanica.

1. 10. 2006.

Opći izbori 2006.

Od 35.375 upisanih birača, na 52 redovna biračka mjesta (i jedno za glasanje u odsu-

stvu) na području općine Gračanica glasalo je 19.895 građana ili 56,2% Za naklonost birača natjecalo 14 političkih stranaka i koalicija i 4 nezavisna kandidata. Glasanje je proteklo sasvim mirno i bez ikakvih incidenata.

13. 10. 2006.

**Otvorena ekspozitura ProCredit banke u
Gračanici**

U preuređenom prostoru prizemlja upravne zgrade “Ozrenke” u centru Gračanice svečano je puštena u rad ekspozitura ove renomirane banke koja je kao članica grupacije od 18 banaka i finansijskih institucija širom svijeta, u posljednjih nekoliko godina razvila svoju vrlo jaku mrežu od 23 poslovne jedinice u svima dijelovima Bosne i Hercegovine. Budući da se u svojoj poslovnoj politici ova banka orijentiše na kreditiranje mikro, malih i srednjih preduzeća, opravdana su očekivanja da će i na ovom području prvenstveno podržavati takva preduzeća jer se na njih i oslanja cjelokupan privredni razvoj gračaničke općine. To je, između ostalog, naglasio i načelnik općine Gračanica Nusret Helić na ceremoniji otvaranja ove Banke u Gračanici, izrazivši zadovoljstvo što je i ta banka prepoznala Gračanicu kao povoljan ambijent za svoje poslovanje.

27. 10. 2006.

**Akademski slikari iz Gračanice, Nijaz
Omerović i Mehmed Bajrić, svojom
zajedničkom izložbom označili početak
rada likovne galerije u svom rodnom
gradu**

Izložba je izazvala veliko interesovanje ljubitelja likovne umjetnosti u Gračanici i po svom umjetničkom dometu, ali i simbolički predstavlja događaj u kulturnom životu Gračanice. Posjetioci izložbe imali su prilike vidjeti retrospektivu zavidnog stvaralačkog opusa i jednog i drugog slikara, vrlo izražene individualnosti i senzibiliteta. I jedan i drugi imaju iza sebe na desetine samostalnih i kolektivnih izložbi, te mnogih vrijednih umjetničkih priznanja i nagrada, kako međunarodnih, tako i domaćih. Poklanjajući svoja vrijedna umjetnička djela ovoj galeriji, njih su dvojica simbolično utemeljili njen budući likovni fundus.